



4. oktober 2016

UKA2016/110

Naalakkersuisut kingusinnerpaamik UKA 2017-imi siunnersuummik savaateqarfinnik tunisinerni tunniussinerniluunniit savaatillit akiitsuinik tamakkiisumik ilaannakortumilluunniit isumakkeerinnissinnaalernermik pisin-naalersitsisumik saqqummiussinissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Inatsisartunut ilaasortaq Aqqaluaq B. Egede Inuit ataqatigiit, siunnersuuteqarpoq aalajangiiffigisassamik tassalu savaatillit akitsuinik isumakkeerinnissinnaalernermik tamannalu oqaseqarfigissavarput.

Nunatsinni nunalerinermik uumasuuteqarnermillu inuussutissarsiuteqarnek nunatsinnut annertummik neqissaqarniarnermut aammalu aningaasarsiornermut nukittorsaataluni ingerlaneq Partii Naleqqamiit tamakkiisumik tapersersoripput oqaatigissavarput.

Nunatta sutigut tamatigut imminut napatinnerulernissaa, aammalu uumasuuteqarnikkut nunalerinikkullu imminnut pilersortuarnissaa nunamut inuillu tamanut pingaartuusoq ilisimalluaratsigu.

Avataaniit eqquusortakkagut neqit naatitallu uagut pilersittagut tunngavigalugu ikilineqarsinnaappata tamanna nunatta aningaasaqarneranut isumalerujussuusoq nalunnigilarput . Taamaattumik uumassuteqarnermik nunalerinermillu annertusaajuarnissaq aningaasalersuinikkullu malinnaatitsinissaq isumaqarpugut nukissaqarfigilluartariaqaripput inuussutissarsiummi ilaqutariippassuarnut tunngaviulersimavoq aamma tapersersugassaq.

Savaatillit nutaamik aallartinniartut pingaartumik inuusuttut nutaamik savaatilinggorniartut eqqarsaatigalugit ullumikkut aqqissuussineq atuutsinneqartartoq naleqqunnaarsimavoq allannngortitariaqalerlunilu.

Tassami savaateqarfiit uninngareersut nutaamik aallartinniassagaanni nutaamik atortulersornissaq ilaatigut pinngitsoorneqarsinnaanngimmat, soorlu maskinat illut savat inaat narsaatit nutaamik iluarsaanneri allarpassuillu suliaasaasarpud aqqinniagassat. Taamaakkaluartorli aamma tamakkiisumik akiitsuusimasunik aamma tigusissallutik tamannalu ilungersunarpoq nutaamut aallartittumut.

Taamaattumik siunnersuuteqartup Aqqaluaq B. Egede tunngavilersutai paasilluarpagut arlaatigullu nutaamik aqqissuussinissaq akitsunillu isumakkeerisinnaanermut tunngasut misissorlugit qulaajarneqarnissaat isumaqatigaarput. Siunissamilu akiitsuinik nakkutiginnilluarluni inuussutissarsiuteqartunut artukkiinani malinnaalluarnissaq kammattuutigissavarput.

Tassanilu aamma aalisarnikkut ESU-mut akiitsuulersimasut ilanngullugit qulaajartariaqarput, tassami amerlasuut akiitsuut utertinneqarsinnaanngitsut akilerneqarsinnaanngitsullu ilisimavagut, aammalu inunnut pineqartunut artornartorsiortitsisut, ilaatigullu toqukkut

qimagussimasut, pineqartut nuliannut assut artornartorsiortitsisartut aaqqippallannissaat kissaatiginarsilluinnarmat.

Taamatut oqaaseqarluta Naalackersuisut ukiakkut 2017-mi ESU-mut akiitsut pillugit tamakkiisumik saqqummiussilersaarnerat utaqqissavarput.

Hans Enoksen